


T693/4248(2)

CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY

NOV 4 1957

2



春秋直解卷三

莊公名同桓公子在位三十二年

元年○春王正月

不書即位父死于外不朝正即位故無書

三月夫人孫遜于齊

諸傳謂文姜畱齊非也公之喪至自齊則夫人歸矣
歸而復有齊之行避也與君同出而不同入彭生死
而姜生國人詫之故避也書孫微辭也說者謂削姜
氏貶也夫與其削姜氏無寧削夫人乎春秋之義無

哈佛大學哈佛燕京
圖書館珍藏印

郝敬解

此

夏單

善

伯送王姬

送公羊作逆

單伯周卿士也。王姬嫁于齊，王使單伯來送。魯主也。嗟夫！一杯之土，未乾枕戈之恨，方始而乃墨衰經，與不共天之人，劫執柯之役，築親迎之館，往則送之喪，則服之是怨，賊為腹心，而淫母殺父，為生死肉骨之感矣。昔申侯以犬戎殺幽王，而平王為之遣戍齊諸兒，以淫惡殺魯桓公，而莊公為之主婚。此一王一侯者，其空桑之子與。

秋築王姬之館于外

為齊築也。于外，避喪也。知避喪之為禮，而不知忘父讐之非禮，猶放飯而問齒決也。

冬十月乙亥，陳侯林卒。

王使榮叔來錫，桓公命。

桓公弒，兄得國，生逋，天討艷妻，誨淫身死，名辱。在位十八年，不一朝王，而王使慙懃存，則問之，死則錫之。天命有德，豈濫若斯，何必削天，乃見其失矣。

王姬歸于齊

自魯歸也

齊師遷紀邢

平鄆茲鄆吾

三邑皆紀也。諸侯有罪，惟天子六師移之，紀罪伊何。而齊擅遷其民，兼其土，明王不作，弱肉而強食也。

二年○春王二月葬陳莊公

夏公子慶父帥師伐於餘丘

於餘丘，邾邑也。慶父，公庶兄也。帥師，專也。凡無君之惡，成于專，然亦書公子。春秋未嘗貶大夫，而況天子諸侯乎。

秋七月齊王姬卒

記曰：齊王姬卒，魯莊公為之服大功，釋殺父之怨，而喪讐人之妻，禮與。

冬十有二月夫人姜氏會齊侯于禚

酌齊地公作部後同

姜氏長惡不悛，闖外之行。十八年間不絕書，而莊公為子無幹、盩之孝，無幾諫之言，敝苟出入，宣淫道路，何以齊其家，無忝秉禮之國哉。詩人所為賦，猗嗟也。

乙酉宋公馮卒

三年○春王正月，湯會齊師伐衛

湯，魯大夫，會齊伐衛。黨讐人伐兄弟也。書會，惡專也。伐鄭由聾，伐邾由慶父，伐衛由湯，魯政下逮，豈待定哀之季，故春秋託始于隱桓也。

夏四月葬宋莊公

春秋左傳卷三
五月葬桓王

天子七月葬。卻尸七年。非禮也。

秋紀季以鄆攜入于齊。

鄆亦紀邑。齊人蠶食餘一丸土。而猶甘心焉。紀季遂以入齊。為附庸。存先祀也。非紀侯志。故曰紀季以

冬。公文于滑。鄭地公穀作郎

會鄭謀紀也。國恥未雪。二姬告難。苟義旅一振。則親怨兩酬。乃趑趄不進。信宿而返。書次懦之也。

四年。春。王二月。夫人姜氏享齊侯于祝丘。魯地

婦人享外諸侯。非禮也。

三月。紀伯姬卒。

魯女也。紀亡。伯姬以憂卒。

夏。齊侯陳侯鄭伯遇于垂。

鄭伯突也。桓公十七年。鄭高渠彌弒忽而立子亶。明年齊襄公殺子亶。鄭人立子儀。子儀立十四年。而突殺之。終有鄭國者。突也。

紀侯大去其國。

紀無如齊何矣。義既不臣。力又不敵。女于周。而王不能庇。控于魯。而魯不能援。故委而去之。嗟夫。魯安得不任其咎矣。夫齊紀讐。尤魯讐也。紀所恃唯魯。宋之

戰爲魯戰也。紀畏齊而卽魯。魯背紀而親齊。紀季何不以鄫附魯而甘入于齊乎。亦知魯不足賴矣。及鄫入又不免而棄以去。去將安歸。不聞魯割一席地處之。亦不聞遣一个使存之。伯姬之葬猶齊葬也。魯人薄而懦。齊人很而貪。春秋惡之。說者顧稱齊復九世之讐。且曰百世可復也。按史周夷王殺齊哀侯。紀侯譖之也。譖之者之讐。百世可復則殺之者之讐。千世復矣。千百世之讐。期于必復則千百世之世道人心將若何。夫虛舟遊世。達人之度也。白刃報讐。任俠之私也。人世恩怨何常。而一一求復。豈有寧日。則爲之

說曰。國君可餘人不可。若是恩怨視貴賤而祖父有厚薄。愈舛矣。則又曰。齊人以上。夫盜疾主人。非疾之利其財。不得不殺之。殺無名。不得不託之。苟無辭。猶託而況有辭乎。齊貪紀託讐耳。何卜之有。善乎。仁者之言曰。敵惠敵怨不在後嗣。故伍員之報楚也。夫差之報越也。春秋皆不錄。而錄齊九世之怨乎。如世儒言高任俠之名。長盜賊之風。縱禽獸之行者。爲孝先。滅人宗祀者。爲名誼。是春秋爲怨毒嚆矢矣。曰。若是君父之讐。可忘乎。曰。烏乎可。臣子之情。同君父之禍。異無罪而殺吾君父。報之在旦夕。旦夕不能期。月期

月不能三年三年不能沒齒而已九世之後不已晚乎天子殺其臣子孫駕禍他人不已濫手春秋非遠于人情者苟質諸人情而可仲尼亦必曰可矣

六月乙丑齊侯葬紀伯姬

薄魯也

秋七月○冬公及齊人狩于禚

搏雉兔而忘雄狐貍也

五年○春王正月

夏夫人姜氏如齊師

師者衆也君子畏十日而況三軍之衆乎所謂人而

無恥不如鼠之有皮者矣

秋鄭黎來來朝

鄭公作倪黎左作稗

鄆小國黎來其君名

冬公會齊人宋人陳人蔡人伐衛

納朔也

六年○春王正月王人子突救衛

莊王惡朔而助黔牟諸侯不從書王人救衛傷王之

微也

夏六月衛侯朔入于衛

朔入遂放黔牟殺二公子王命蔑如矣

秋公至自伐衛○螟

冬齊人來歸衛俘俘公作實

衛賂也齊歸齊主也稱俘諱也抗王命黨賊而以狗

于貨故諱

七年○春夫人姜氏會齊侯于防魯地

夏四月辛卯夜恆星不見夜中星隕尹如雨穀作辛卯昔

記異也恆星常見之星也

秋大水無麥苗

夏正之五月無麥又無禾苗災也

冬夫人姜氏會齊侯于穀齊地

八年○春王正月師次于郎以俟陳人蔡人甲午治兵

公作祠兵

將伐邾也治兵習伍也

夏師及齊師圍邾邾降于齊師邾公作成

邾魯同姓輔讐人而伐兄弟又不得受功焉是為讐

人走狗爾

秋師還

春出而秋還師與有無名乎討賊乎勤王乎毒民構

怨耳矣

冬十有一月癸未齊無知弒其君諸兒

諸兒之淫惡君子識其不祥無知者其從弟也先僖公愛之諸兒絀之無知遂弑之自立召忽管仲以子糾奔魯鮑叔牙以小白奔邾

九年○春齊人殺無知

討賊之辭也

公及齊大夫盟于斲技魯地公穀作暨

謀納子糾也

夏公伐齊納子糾齊小白入于齊公穀作納糾

既盟而復伐之小白之黨不從也書入逆辭也弑兄

得國故不與蔡季同歸

秋七月丁酉葬齊襄公

說者謂君弑賊討而後書葬無是也宋萬弑閔公賊討矣亦不書葬

八月庚申及齊師戰于乾干時我師敗績○九月齊人

取子糾殺之

魯以師納子糾齊人拒而敗之因索管仲魯與之命殺子糾魯殺之卵翼不成遂翦以謝敵何其不承權與也不書魯殺諱也

冬浚洙殊

備齊也

十年○春王正月公敗齊師于長勺魯地

齊伐魯報乾時之役也魯人敗之傳曰凡書敗詐春
秋書敗多矣非必盡詐也戰匪信之物宋襄好信貽
笑千古亦書敗不罪戰而罪不信是操刃而禁其割
也禁其操刃可也

二月公侵宋

宋未有隙于魯魯驕于長勺之勝爾

三月宋人遷宿

宿小國聞于宋魯宋人挾魯怨而遷之非天子可以
廢置人國乎

夏六月齊師宋師次于郎公敗宋師于乘丘魯地

齊宋報怨之師也

秋九月荆敗蔡師于莘以蔡侯獻舞歸舞穀作武

息侯以蔡侯無禮于其夫人息媯致楚師以敗蔡師

書執蔡侯甚楚也書荆史文也說者曰春秋夷楚不

與其為國故州之夫禹貢九州而朝者萬國周一州

為二百一十國州非小于國也楚居荆荆以卑之吳

亦夷居揚而何不揚之祇可笑矣夫國於天地皆王

土聖人於人皆同類惟六服之外大漠窮島遠不可

至其俗不可習其地不可任其民不可臣其政教不

可通。不得不置之勢耳。若夫襄鄧汝漢。近在侯綏商
頌曰。維女荆楚。居國南鄉。言至近也。揚越之地。會稽
之山。具笠之澤。皆職方內。尤貢入焉。正朔加焉。巡狩
至焉。朝會同焉。帝王盛時。以封賢哲。為藩輔。仲尼一
切割為夷狄。僅僅守一規之中。原曰。此王民。王土耳。
不亦觸蠻之天下也。與哉。而禹湯文武。不亦棘端之
王也。與哉。其說始于漢司馬遷。謂楚故蠻夷。吳自壽
夢始通中國。夫壽夢時。春秋之末。造矣。九州闢。自唐
虞歷夏商周。千有餘歲。豈春秋定哀前。荆揚尚為異
域乎。齊桓伐楚。問王祭不共。未嘗詆其為夷。管仲遣
蒙孫通好。宋襄求霸。乞盟于楚。世儒何據。創為此例。
古稱荆蠻。猶魯淮夷。齊萊戎。周之陸渾。晉之赤白狄。
不以累周。晉齊魯。奈何以羣蠻。故并累吳楚也。世儒
欲諛霸無名。而取諸攘夷。攘夷無名。而取諸服楚。偽
起凡例。非春秋本義。春秋惡吳楚為王。非惡其為夷
狄也。

冬十月。齊師滅譚。譚子奔莒。

初。小白出亡。過譚。譚子不禮焉。及國。又不賀。齊人遂
滅譚。夫諸侯失禮于天子。一則貶。再則削。非天子而
失禮。罪不抵滅。春秋書滅國。自齊桓始。君子所以惡

于霸也

十有一年○春王正月

夏五月戊寅公敗宋師于鄆地效魯

宋脩乘丘之怨也

秋宋大水

外災弔則書

冬王姬歸于齊

過魯也齊魯方構故魯不主婚

十有二年○春王三月紀叔姬歸于鄆

初紀季以鄆入齊存宗祀也紀侯大去九年而叔姬

復歸君死不忘先祀從一之義也錄叔姬所以甚齊

夏四月

秋八月甲午宋萬弒其君捷及其大夫仇牧捷公作接

乘丘之役魯俘宋大夫長萬釋歸宋公與之博而婦

人在側萬視婦人而誇魯君美公斥之遂弒公仇牧

救之并殺牧

冬十月宋萬出奔陳

宋人立公子御說是為桓公賂陳請萬醢之凡弒君

之賊殺無不書者殺人醢非祥刑故不書說者謂君

弒賊討而後書葬宋萬討矣閔公亦不葬何也閔公

弒于蒙澤五族內亂明年春齊人徵會于外不成葬
魯不會故無書也暴君父之柩而以討賊賊不得將
終不葬乎或曰不書非真不葬然則春秋之義可言
不可行愈非也

十有三年○春齊侯宋人陳人蔡人邾人會于北杏齊侯

穀作齊人
北杏齊地

齊桓公謀霸因宋亂召諸侯會于北杏以是嘗諸侯
也

夏六月齊人滅遂

北杏之會遂人不至齊滅之三年之內滅國者二霸

之興小國之害也

秋七月○冬公會齊侯盟于柯齊邑

始及齊平

十有四年○春齊人陳人曹人伐宋

宋背北杏之盟也

夏單伯會伐宋

齊以宋亂請于王王使單伯會師此王臣受盟之始
重耳襲之召天子徵兵畿內桓作備也

秋七月荆入蔡

蔡侯譽息媯以蠱楚子楚子滅息取媯而嬖更爲伐

蔡詩云豈不爾受既其女遷蔡哀侯之謂乎

冬單伯會齊侯宋公衛侯鄭伯于鄆鄆地 鄆衛

宋服也

十有五年○春齊侯宋公陳侯衛侯鄭伯會于鄆

諸侯從齊也

夏夫人姜氏如齊

諸兒死矣小白脩內政而姜猶未改步則其惟薄亦

可知矣所以卒亦有中冓之禍與

秋宋人齊人邾人伐鄆倪公作兒

鄆宋附庸也齊為宋伐故主宋

鄭人侵宋

乘宋之有事于鄆也

冬十月

十有六年○春王正月○夏宋人齊人衛人伐鄭

為宋伐也

秋荆伐鄭

鄭厲公自櫟入鄭殺子儀告楚緩楚人伐之

冬十有二月會齊侯宋公陳侯衛侯鄭伯許男滑伯滕

子同盟于幽宋地公作公會許

齊桓公始霸也會不列公內稱不備也說者謂公不

赴諱之既書會何為不赴不赴而諱是貴盟也春秋之義賤盟是年王使虢公命晉曲沃伯以一軍為晉侯此晉之始不書春秋于晉亦可知也

邾子克卒

凡諸侯卒皆書爵穀梁謂稱子為進之迂也

十有七年○春齊人執鄭詹公作詹

鄭大夫也鄭侵宋又不朝齊齊人執之此霸主執人之始書惡之世儒謂伯討謬也

齊滅遂使人戍之遂人醉戍者酒盡殺之

夏齊人殲于遂殲音失公作戕

秋鄭詹自齊逃來

來魯也君子遠恥以禮蒙難以貞書逃賤之

冬多麋

記異也

十有八年○春王三月日有食之

不日不朔史闕也

夏公追戎于濟上西聲

戎侵魯也

秋有貳域或二音

短狐射人者也書異

春秋正義

冬十月

十有九年○春王正月○夏四月

秋公子結媵印陳人之婦于鄆緜遂及齊侯宋公盟

結以媵人之婦行泣盟非誠也是以有三國之師諸

傳拘一字之例為遂事謬也

夫人姜氏如莒

書蕩也

冬齊人宋人陳人伐我西鄙

討子結之慢也稱鄙遠之之辭不使敵師踐我郊牧

及我門闕然則不及乎曰及矣聖人終諱之皆所謂

脩辭之誠游夏不能贊者也後多做此

二十年○春王二月夫人姜氏如莒

夏齊大災

火也

秋七月○冬齊人伐我

說者謂齊桓公攘夷殆此類與

二十有一年○春王正月○夏五月辛酉鄭伯突卒

秋七月戊戌夫人姜氏薨

春秋未嘗以字貶人明矣文姜之惡其薨也猶夫人

穀梁謂為婦人弗目也則奈何他事而又目之胡氏

謂已為君母難于貶也則奈何他事而又貶之是故
春秋無例

冬十有二月葬鄭厲公

二十有二年○春王正月肆大眚損公作省

聞赦小過者矣不聞肆大眚莊公以母喪推恩未可
為典刑

癸丑葬我小君文姜

陳人殺其公子御寇御公殺作禦

陳宣公殺子書陳人不父也傳不詳所以

夏五月

凡紀時以首月夏五月闕文也

秋七月丙申及齊高傒盟于防

魯及也盟高傒乞婚也乞婚而以盟徼大國之寵而

忘其讐也

冬公如齊納幣

禮親迎不親納幣莊公生于桓六年今三十有六歲
矣婚豈其繼室與始婚不書而繼室書為其偶讐人
之子也

二十有三年○春公至自齊

祭債叔來聘

春秋正義 卷三
周卿士聘魯也

夏公如齊觀社

慢遊也

公至自齊○荆人來聘

楚聘魯也。行人不名，史逸也。凡大國人來書聘，如王人、齊、楚之類，小國來書朝，如杞、滕、薛、穀、鄧、邾、葛人之類。苟春秋卑楚，宜比滕、薛，不然宜無書。今入春秋五十年，書大國之聘，惟楚與齊。說者謂楚不得與齊，魯齒何居？又謂書人，所以進之。苟不進之，宜何書？公及齊侯遇于穀，蕭叔朝公。

穀，齊地。蕭，魯附庸。叔，其君名。朝，公于穀也。

秋丹桓宮楹

脩禰廟，將逆齊女也。君子曰：先公之讐，齊女之父也。丹楹可以慰厥考乎？禮有大于丹楹者。

冬十有一月，曹伯射亦姑卒

十有二月甲寅，公會齊侯，盟于扈鄭地

以婚齊之故，再盟。一遇如齊者三。

二十有四年○春王三月，刻桓宮桷。

將見齊女也。君子曰：先公之讐，齊女之父也。刻桷可以謝厥考乎？事有厲于不刻桷者。

葬曹莊公

夏公如齊逆女

親迎也

秋公至自齊○八月丁丑夫人姜氏入

凡婚姻無故不書哀姜之歸自盟而納幣而遇而再盟而親迎而至而入何詳也忘父讐耦淫女以買禍書入難之也

戊寅大夫宗婦覲用幣

宗婦大夫妻也夫人歸而大夫與其妻覲禮也贄用幣非禮也婦贄不過棗栗服脩

大水○冬戎侵曹曹羈出奔陳赤歸于曹

羈赤皆曹莊公子戎逐羈而納赤是為僖公

郭公公羊連上文作赤歸于曹郭公

闕文也詳夏五

二十有五年○春陳侯使女汝叙來聘

書字史文也諸傳謂為嘉之大夫書字多矣豈必盡嘉

夏五月癸丑衛侯朔卒

衛朔殺二兄抗王命以篡逆得國其卒也亦諸侯春秋未嘗褒貶人也

六月辛未朔日有食之鼓用牲于社

陰侵陽告于社社陰主也伐鼓用牲是謂巫風

伯姬歸于杞

其詳不可考其莊公之愛子與當時必有踰禮者故書

秋大水鼓用牲于社于門

土妻水秋祀門皆委巷之禮也

冬公子友如陳

報女叔之聘也

二十有六年○春公伐戎公無春字

報濟西之役也

夏公至自伐戎○曹殺其大夫

不名史逸也古者諸侯之大夫皆命于天子有罪以

請不敢專也刑不上大夫近君也殺大夫必書慎刑

也有罪無罪質其事而知名不名非例也

秋公會宋人齊人伐徐

徐近魯之國宋齊為魯伐也

冬十有二月癸亥朔日有食之

二十有七年○春公會杞伯姬于洮地 魯

會洮為愛女也諸侯非民事不舉

夏六月公會齊侯宋公陳侯鄭伯同盟于幽

陳鄭從齊也說者以書同為同尊周于是而後授之

諸侯焉夫桓何能尊周同盟與同尊周遠也且桓不

能得諸侯而待仲尼授之乎詩張之言也

秋公子友如陳葬原仲

原仲季友之友也朋友死而越國送私交也大夫非

君命不越境

冬杞伯姬來

婦無外政出則書

宮慶來逆叔姬

宮慶自逆其為君逆不可考矣

杞伯來朝

伯姬在魯也

公會齊侯于城濮衛地

將伐衛也是年惠王命齊桓公為侯伯不書春秋于

齊桓之為伯可知也

二十有八年○春王三月甲寅齊人伐衛衛人及齊人

戰衛人敗績

齊桓新為侯伯王命討子頹之黨衛人不量敵而與

戰所以敗也然不書王命何也假王命受賂還非誠

春秋正義 卷三
王命也。書人君大夫國人皆人也。說者謂將卑師少，苟將尊師多，非人乎？或曰：貶也。王命何貶之有？

夏四月丁未邾子瑣卒

秋荆伐鄭公會齊人宋人救鄭宋人下公邾婁人

說者謂書救為善之春秋諸侯之相救猶揚堞而弭塵也。奚善之有？

冬築郛郛公穀作微

病民也是歲饑

大無麥禾○城孫辰告糴于齊

無麥又無禾饑甚也于冬書無以卒歲也

二十有九年○春新延廡救

加塗曰新禮年饑馬不秣新廡失務也

夏鄭人侵許○秋有蜚沸

蝗也

冬十有二月紀叔姬卒

錄無告也以薄魯

城諸及防

饑歲相仍役不時也

三十年○春王正月○夏師次于成左無師字

齊人伐郛魯自備也

秋七月齊人降巷平鄆

鄆近齊小國力服曰降

八月癸亥葬紀叔姬○九月庚午朔日有食之鼓用牲

于社○冬公及齊侯過于魯濟沛

濟水經齊為齊經魯為魯遇謀山戎也山戎病燕

齊人伐山戎

齊桓公九合諸侯不以兵車戎狄殘王室滅友邦蓄

縮自保伐山戎卷甲千里懸車束馬無遺力舍腹心

而護手足霸者所以求名也

三十有一年○春築臺于郎

營不急也

夏四月薛伯卒○築臺于薛魯地

周四月夏二月也築臺非時也

六月齊侯來獻戎捷

凡諸侯有四夷功獻于王侯國不相遺俘也濟之遇

齊謀戎于魯及捷來遺之俘書獻史尊內也

秋築臺于秦魯地

作無益害三時書屢也

冬不雨

恆暘也

三十有二年○春城小穀

魯城也。春城不時也。不書魯內稱不備也。左傳謂為管仲夫管仲食于穀齊地也。而小穀魯地也。惟魯地不國。

夏宋公齊侯遇于梁丘

梁丘地介曹邾間。去齊八百里。宋齊方睦。桓與宋謀楚而遠為遇。當時必有資于宋者。故書先宋。然其詳不可考矣。桓之謀諸侯也。自宋始。諸侯之從齊也。宋為先故。齊宋親睦。無會不與。蓋齊霸宋與力焉。

秋七月癸巳公子牙卒

季友叔牙慶父皆桓公子。莊公弟也。莊公病。哀姜無子。公召季友而屬于般。叔牙謀立慶父。季友酖叔牙殺之。書卒諱也。

八月癸亥公薨于路寢

君薨必於路寢禮也。時方內亂。書公薨得正以明微也。

冬十月己未子般卒。公子慶父如齊。己未公穀作乙未

季友立子般。慶父使圉人犂弒之。季友奔陳。慶父立莊公幼子啓方。為閔公。求好于齊。子般不書弒。季友不書奔。何也。子般賤而未樹也。莊公淫于黨氏女生。

般哀姜之娣生啓方成風生申舍申啓方屬子般公之溺愛也季友比般殺兄亦未仁也如曰公命何不與諸大夫國人共立于朝而即位黨氏以誨禍是子般未成爲君季友于先公之託未效也然慶父以弑般出奔書如齊何也從容之辭見魯不討而齊爲主藏也聖人于內惡蓋亦不忍直之

狄伐邢

凡戎狄薦居中土皆有國邑不書國書狄以別于諸夏此春秋待夷狄之明法也

春秋直解卷三終

春秋直解卷四

郝敬解

閔公名啓方莊公庶子在位二年

元年○春王正月

不書即位何也公時方九歲強臣牽率以爲君國亂無朝正即位禮史無書也

齊人救邢

邢有狄難也此所謂彼善之師亦書人人豈貶乎

夏六月辛酉葬我君莊公

秋八月公及齊侯盟于落姑季子來歸落公穀作洛齊地

是時慶父在齊季友在陳落姑之盟爲立閔公和慶季也季友書歸慶父不書何也外之也然則予季友乎非也季友以託孤不效出奔其歸也不能戢武闈之難又不能討慶父之惡何爲予之國亂無主大臣離散畧志其還所以魯有季氏也

冬齊仲孫來

齊大夫仲孫湫也不書使不名隱也國亂無主齊來覘我故隱何以知之歸而桓公問曰魯可取乎曰不可言及慶父曰若何去之君其待之則敵情隱可知也

二年○春王正月齊人遷陽

陽小國齊人偪而遷之霸之興小國之害也

夏五月乙酉吉禘于莊公

禮三年喪畢納主于廟而後吉祭莊公喪未兩期用吉祭非禮也禘帝祭也三王之始祖皆帝子春而禘祭始祖所出之帝曰禘禮不王不禘魯禘僭也然則自閔公始乎曰禘非自閔公始喪用吉禘自閔公始因吉以表禘因事以表義也

秋八月辛丑公薨

慶父通于哀姜哀姜欲立之使賊弑公于武闈書薨

諱也不地微也

九月夫人姜氏孫遜于邾公子慶父出奔莒

姜氏書孫諱逃也慶父書奔諱弑也淫如姜氏猶稱夫人逆如慶父猶稱公子春秋未嘗以字貶也

冬齊高子來盟

公子申莊公庶子閔公庶兄母成風善事季友季友立之是爲僖公高子來盟定僖公也是時魯無君三年矣當慶父奔齊齊桓苟仗義討之則武闡之難不作而哀姜之醜不暴于外乃姑落一盟從史賊子及中冓禍起舉國奔竄使高僖來立子申數哀姜殺之境外齊威名立而魯推踣甚矣儒者猶謂仲尼喜高僖來不名書字之例誤之也

十有二月狄入衛

衛自宣公以來帷薄之醜極已有夷狄之禍宜哉是時齊桓公稱霸遠伐山戎救燕而近不能卻狄以全衛說者猶言安攘何與

鄭棄其師

鄭文公惡高克使帥師禦狄于河上久而不召師潰克奔陳君子曰行法制命之謂君有罪不討而以三軍之衆羈勒一夫是投鼠以千金之璧也豈不愚哉

書曰鄭棄其師顯非之也故春秋無隱

春秋直解卷四終

春秋直解卷五

郝敬解

僖公名申莊公庶子閔公庶兄在位三十三年

元年○春王正月

不書即位國亂損禮也

齊師宋師曹師次于聶北救邢左作曹伯

齊桓公以三國之師逗遛不進狄遂滅邢君子是以

知霸者急人之難之不誠也仲尼謂九合諸侯不以

兵車夫不以兵車合諸侯可也不以兵車而亡諸侯

孰如以兵車存之之為愈也愛兵車而不愛諸侯是

春秋正義 卷五
亡兵車。重于亡諸侯也。故曰管仲之力。猶曰管仲之謀。云爾。讀管子書。而後知聖言之精也。管子者。貪亂為功。以取為予者也。

夏六月。邢遷于夷。儀齊師。宋師。曹師。城邢。夷儀公作陳儀

不書齊遷。不歸齊功也。霸者巧于市恩。而精于計獲。苟魯不內亂。無立孤之績。邢衛杞不亡。無興滅之恩。救邢而戰。則受敵。不戰而遷。則受功。救之未亡。其德小而賑之既亡。其施大。避敵而微功。舍小而取大。仲尼所以不齒桓之存三亡也。

秋七月。戊辰。夫人姜氏薨于夷。齊地齊人以歸。

齊桓公取哀姜于邾。殺之于夷。以尸歸魯。稱薨。諱也。楚人伐鄭。

鄭從齊也。荆書楚。史文也。胡氏正名之說。詘楚也。詘楚。以伸齊晉。春秋未嘗與齊晉。未嘗詘楚。三國皆不寧侯也。楚稱王。而齊晉不稱王。楚僭名。而齊晉僭實也。春秋于楚。生稱子。而沒其王。死不書葬。而沒其諡。如此而已矣。

八月。公會齊侯。宋公。鄭伯。曹伯。邾人。于榿。稱宋地。公作打。謀楚也。

九月。公敗邾師于偃。邾地。公作纓。

脩哀姜之怨也

冬十月壬午公子友帥師敗莒師于鄆歷魯地獲莒棼女

聲酈公作
犁穀作麗

魯請慶父于莒殺之莒人來責賂季友敗之而獲莒

子之弟棼公賜季友汶陽田及費季氏之盛自此始

十有二月丁巳夫人氏之喪至自齊

哀姜之柩也說者謂不書姜為貶夫不書姜而書夫

人非貶也姜之不淑何待于貶乎君母而死于人手

暴尸境外臣子恫乎有餘悲奈何更持深文似申商

也

二年○春王正月城楚丘

魯與諸侯為衛城也衛滅于狄營楚丘以遷此齊人

功而不書齊何也康叔故字已淪為腥土矣何功之

有不存之未亡而遷之既滅霸者自以為功春秋之

義貴大公也

夏五月辛巳葬我小君哀姜

哀姜之不能小君甚矣未有以貶之

虞師晉師滅下陽號邑下公
穀作夏

晉伐虢以璧馬假道于虞虞導晉師入虢滅下陽書

先虞戎首也說者于齊桓之霸也謂為安中國而中

國日吞併也。謂為攘夷狄。而夷狄日侵陵也。謂為九合諸侯。而晉楚日橫行也。謂為一匡天下。而小國日顛危也。謂為尊周室。而王室日卑微也。讀春秋而霸者之事。若燭照矣。

秋九月。齊侯宋公。江人黃人。盟于貫。宋地公作貫澤

江黃。楚與國也。盟江黃。謀楚也。說者謂人為大夫。豈江黃大夫。而與齊宋之君齒乎。可知書人之非微矣。

冬十月。不雨。

秋旱也。

楚人侵鄭。

鄭從齊也。

三年。○春。王正月。不雨。○夏。四月。不雨。

自冬至夏。恒暘也。

徐人取舒。○六月。雨。

前此不雨者。凡九月。

秋。齊侯宋公。江人黃人。會于陽穀。齊地

再謀楚也。

冬。公子友如齊。蒞盟。穀作公子季友蒞公穀作蒞後同

公不與陽穀之會。使上卿往受盟。書蒞。史尊內也。

楚人伐鄭。

四年○春王正月公會齊侯宋公陳侯衛侯鄭伯許男
曹伯侵蔡蔡潰遂伐楚次于陘刑楚地

齊以諸侯伐楚蔡楚與國侵蔡致楚也次于陘待平也

夏許男新臣卒

穀梁謂許男死于師不地內桓師非也蔡近許許男以病歸卒何以知之宣公九年書晉侯卒于扈成公十三年曹伯廬卒于師襄公十八年曹伯負芻卒于師二十六年許男甯卒于楚昭公二十三年蔡侯東國卒于楚定公四年杞伯成卒于會凡諸侯客死未

有不地者故許男卒於其國也

楚屈完來盟于師盟于召陵

諸侯之師次于陘楚使屈完來師遂退次于召陵盟說者曰桓公服楚矣春秋與之非也當是時桓公稱霸二十餘年諸侯力能抗齊不受盟者惟秦與楚秦遠而楚近楚屈則東諸侯震而齊益張故桓公拳拳以楚為事而心畏楚之強也不得楚盟而心畏諸侯輕齊也故先舉蔡嘗楚以示諸侯而次于陘夫次陘無必進之志矣何以知其然也齊果能討楚于楚使來當首問其稱王問其伐鄭問其虜蔡侯之罪有辭

止無辭進服則止不服則進此堂堂問罪之師矣釋此不言枝梧遠引包茅不貢昭王不復是明借以易托之辭苟求完局恐逢彼之怒至戰而自損也守口如瓶畏敵如虎奚貴爲討哉陳師以出未踐郢國之郊未覲楚子之面僅僅屈完一來遂振旅歸歸未踰年而楚滅弦矣踰年又圍許矣自召陵一見楚大夫後同盟有事未聞楚一介一旅從其桀警如故也齊何嘗能服楚而仲尼與之然則楚不當伐與曰春秋諸侯無日不相伐也數諸侯之罪可伐不但楚論討罪之權征伐不在齊謂王室不尊乎無如子頹叔帶之難惠襄之播遷矣然而非楚也謂中國不安乎無如狄滅邢衛戎入曹魯內亂晉亡虢鄭伐許齊滅遂滅譚遷陽降鄆伐宋與魯陳之甚矣非獨楚耳謂夷猾夏乎楚本非夷也管仲讓楚不謂猾夏而後儒以爲猾夏謬也春秋以夷猾夏者莫如狄與戎齊不能攘而欲攘楚左也故孟子曰春秋無義戰仲尼之徒無道桓文之事者召陵城濮皆所謂摟諸侯以伐諸侯三王之罪人也仲尼奚取焉

齊人執陳轅濤塗

轅公穀作袁

陳轅濤塗語鄭申侯曰諸侯之師還過陳鄭陳鄭病

可給使東循海申侯以告齊齊人執轅濤塗夫師行而人病之師可知也不罪已而責人否臧凶也書執以力服也孟子曰以力服人未有能服人者春秋惡之

秋及江人黃人伐陳

齊命也討其誤師

八月公至自伐楚○葬許穆公穆公作繆

冬十有二月公孫茲帥師會齊人宋人衛人鄭人許人

曹人侵陳茲公作葱

再伐也陳服乃歸轅濤塗

五年○春晉侯殺其世子申生

晉獻公嬖驪姬生奚齊其娣生卓子世子申生賢驪

姬譖之遂自縊也自縊而書晉侯殺猶晉侯殺之也

陳宣公殺太子御寇書陳人猶陳人也故春秋無例

杞伯姬來朝其子

歸寧也因以其子朝

夏公孫茲如牟

其事不可考傳謂娶焉未聞大夫娶而書者其必有

故

公及齊侯宋公陳侯衛侯鄭伯許男曹伯會王世子于

首止 衛地公穀作首戴後同

諸侯有事王室不朝京師而在世子于侯國非禮也
傳曰惠王欲易世子立叔帶桓公合諸侯定之然則
世子無王命為私會也背父植黨託外援脅內無父
也桓公不能以忠義匡王而誘世子樹私惠無君也
要君脅父大亂之道也及世子立叔帶以戎伐周王
室再亂齊為逋逃主而說者謂首止定儲豈其然乎
豈其然乎

秋八月諸侯盟于首止○鄭伯逃歸不盟

惠王惡諸侯之盟也召鄭伯從于楚鄭伯逃歸君子
以是知周末嘗患楚也而齊晉彊為周患之齊晉未
嘗為周損楚也而世儒彊為周損之

楚人滅弦弦子奔黃

弦因江黃附于齊楚滅之

九月戊申朔日有食之

冬晉人執虞公

晉再假道于虞伐虢滅之還館于虞遂滅虞不書滅
虞虞自滅也書執虞公惡晉也

六年○春王正月

夏公會齊侯宋公陳侯衛侯曹伯伐鄭圍新城

鄭伯逃盟也

秋楚人圍許諸侯遂救許

楚圍許救鄭也

冬公至自伐鄭

七年○春齊人伐鄭

新城之役未得志也

夏小邾子來朝公作小邾
婁子後同

鄭羣來也書子爵也說者謂齊桓公始請王爵之無

稽

鄭殺其大夫申侯

齊討逃盟鄭伯殺申侯以說夫逃盟非申侯罪而申

侯不為無罪初陳轅濤塗之給齊師也與申侯謀申

侯遂以告齊是申侯為鄭不如轅濤塗為陳也人孰

無君而賣友誤國罪一齊執濤塗賞申侯虎牢夫虎

牢鄭之錫土也齊焉能奪君之有與臣申侯亦不請

於君受之罪二既受之遂美其城自炫知有霸主蔑

視其君罪三書曰一人三失怨豈在明宜其及矣

秋七月公會齊侯宋公陳世子款鄭世子華盟于甯母

魯地穀
作寧母

謀鄭也是役也鄭世子華以鄭叛于齊管仲辭焉明

春秋正義 卷五 九年鄭伯遂受盟于華由是得罪

曹伯班卒班公作般○公子友如齊○冬葬曹昭公

八年○春王正月公會王人齊侯宋公衛侯許男曹伯

陳世子款盟于洮地切曹鄭伯乞盟陳世子款下公

惠王崩世子患叔帶告于齊為洮之會鄭伯悔逃乞

盟

夏狄伐晉

狄人滅邢滅衛伐晉滅溫儻所謂猶夏者非與齊人

皆不能討而世儒特以伐楚為攘夷何居

秋七月禘于大廟用致夫人

僖公夫人薨姜也不書氏公夫人不別也遠則氏以

別之歸魯不書何也無故不書文哀出三姜故詳也

魯禘非禮五月禘非時致夫人用禘是以夫人禘也

諸傳謂祔哀姜哀姜無祔禮五年而後祔乎非也

冬十有二月丁未天王崩

按傳惠王崩于去年之冬世子以叔帶故秘不發喪

至是始來告書後期史文也經因之皆所謂無毀譽

也

九年○春王正月丁丑宋公御說悅卒公穀正月作

夏公會宰周公齊侯宋子衛侯鄭伯許男曹伯于葵丘

周地

定襄王也。宋稱子襄。公在喪也。

秋七月乙酉伯姬卒。

伯姬未歸書卒其故不可考

九月戊辰諸侯盟于葵丘。

會而後盟也。說者謂此舉為齊桓公盛事。春秋無以

予之

甲子晉侯嵬

詭諸卒甲子公作甲戌嵬公殺在詭

冬晉里克殺其君之子奚齊

殺公作弒

晉獻公殺申生為奚齊也。身死而奚齊不免焉。慈父

之為愛子計者宜何如哉

十年○春王正月公如齊

朝也不書至不告至也

狄滅溫溫子奔衛

溫子周大夫蘇公叛王即狄又不能于狄狄人滅之

晉里克弒其君卓及其大夫荀息

卓公作卓子

初申生之死也。獻公以奚齊卓子屬荀息。君命雖頗

國可無主乎。里克既殺之立卓子又殺之吁甚矣

夏齊侯許男伐北戎

北戎之役不憚再舉狄蠶食中土而置不問是舍根

本灌枝葉也

晉殺其大夫里克

初驪姬之亂公子重耳奔蒲夷吾奔梁是歲王人與齊秦共立夷吾為惠公惠公入殺里克討其殺二君與一大夫仲尼無以非之胡氏曲為之辭書爵之例誤之也

秋七月○冬大雨雪

雪公作雹

十有一年○春鄭殺其大夫平不鄭父

里克之黨也

夏公及夫人姜氏會齊侯于陽穀

婦人送迎不出門見兄弟不踰閭會于陽穀非禮也

秋八月大雩

旱禱也

冬楚人伐黃

黃貳于齊也

十有二年○春王三月庚午日有食之○夏楚人滅黃黃以齊見滅而齊人不能救君子是以知霸力之難恃也

秋七月○冬十有二月丁丑陳侯杵臼卒

杵公作處

十有三年○春秋侵衛

狄之禍衛甚矣世儒猶謂春秋有攘夷者

夏四月葬陳宣公

公會齊侯宋公陳侯衛侯鄭伯許男曹伯于鹹衛地

子帶召戎伐王諸侯謀戍周是時子帶在齊桓公主藏而外與諸侯謀戍霸者之事如鬼蜮有虛名而無實意也

秋九月大雩

夏正七月也或曰譏後時非也雩後時旱既甚矣

冬公子友如齊

十有四年○春諸侯城緣陵祀邑

左傳謂諸侯不書其人有關也經有關而傳不知何以輔經或曰舊史闕也舊史闕書諸侯凡書諸侯者皆史闕矣城緣陵何也遷杞也杞逼于淮夷齊率諸侯遷之不書齊何也齊既稱伯矣狄滅邢滅衛滅杞三國而齊不能保一勞諸侯之衆紛紛改作齊任功而諸侯憊矣故書諸侯也

夏六月季姬及鄆子遇于防使鄆子來朝鄆穀作鄆後同

左傳謂鄆季姬歸寧公怒止之以鄆子不朝也夏季姬期鄆子于防以朝若是則季姬已為鄆夫人何以不書鄆季姬季姬既室鄆矣明年九月又書季姬歸

于鄆何也。公穀謂季姬奔鄆子成約使鄆子求娶。如後世公主自擇夫之類。書來朝諱之也。

秋八月辛卯沙鹿崩

沙鹿晉地山崩書異也。重耳將入晉楚爭而天下紛紛儻其兆與。

狄侵鄭

冬蔡侯肸欣入聲卒

十有五年○春王正月公如齊○楚人伐徐

徐即齊也

三月公會齊侯宋公陳侯衛侯鄭伯許男曹伯盟于牡

丘遂次于匡地衛公孫敖帥師及諸侯之大夫救徐

帥公作率

同後

自霸者有盟會而中原無寧歲矣。仲尼所憂不在徐也。晏嬰有言。飢者弗食勞者弗息方命虐民盟會之謂也。儒者顧亟稱之曰某衣裳之會某兵車之會嗟夫春秋策書會耳何擇其為兵車為衣裳也巧言夸毗歆艷霸功而竊附于仲尼之徒所可為公穀恨者識不足也。

夏五月日有食之○秋七月齊師曹師伐厲

救徐也厲楚與國也

八月螽○九月公至自會○季姬歸于鄆

乙卯晦震夷伯之廟

晦月之盡也夷伯魯大夫展氏寔擊其廟異也

冬宋人伐曹

春同盟而冬伐之不信也時曹從齊伐厲宋伐曹是

宋有貳志于楚也齊稱霸以來宋無會不與桓公方

以繼嗣託宋宋有異志何與舊史亡其詳不可考

楚人敗徐于婁林

徐地

宋曹相攻故救徐無功

十有一月壬戌晉侯及秦伯戰于韓獲晉侯

晉惠公之入也淫瀆而好殺背施而貪災秦置之秦

復取之故曰獲也

十有六年○春王正月戊申朔隕公作石于宋五是月

六鷁逆穀作鷁退飛過宋都

記異也不數年而襄公戰死儻其兆與

三月壬申公子季友卒

季友以援立之恩公爵之世卿獲莒拏賜費與汶陽

田遂為強宗竟以弱魯古蓋臣所以戒于寵利也說

者謂春秋賢之書公子豈其然乎

夏四月丙申鄆季姬卒○秋七月甲子公孫茲卒

冬十有二月公會齊侯宋公陳侯衛侯鄭伯許男邢侯
曹伯于淮

齊人又以諸侯城郟役卒夜呼遂不果城自葵丘之
會諸侯無歲不勤十三年會于鹹十四年城緣陵十
五年會牡丘今年又會于淮城邢城衛城杞皆諸侯
也禮曰君子不竭人之忠以全交也勞人而自以為
功頻數亡厭欲以全交難矣宋齊至相得也往年伐
曹已有貳志今與盟是陽諾耳霸者之澤如潦水立
涸烏能使人不倦乎

有七年○春齊人徐人伐英氏

英氏楚屬也齊不能救徐遷怒于英遂以徐伐之

夏滅項

魯滅也季孫之謀公在會齊人止公不書諱也

秋夫人姜氏會齊侯于卞九月公至自會

權臣賈禍而君因夫人求免及國不問欲季氏不橫
得乎

冬十有二月乙亥齊侯小白卒

齊桓公弒兄得國不可以為人弟身為侯伯畢世不
王不可以為人臣嫡庶不正羣子闖牆不可以為人
父內寵外嬖釀成身後之禍幾致亡國不可以為人

君大本先撥矣晚節荒老以後事屬宋襄壯立之會
 宋有二志負託不明貽謀不善宜身死不殞而一敗
 瓦解也碌碌經營四十餘年說者謂存三亡國定王
 世子葵丘五盟為高誼質諸春秋無顯蹟論語九合
 一匡本管子書中語桓公嘗自稱聖人因言節取成
 人之美云爾世儒緣飾一匡為尊周九合為安夏春
 秋具存何有影響千餘年承訛不察是以見霸術迷
 人而春秋大義虧蔽于世儒之附會志士所為投筆
 歎也

十有八年○春王正月宋公曹伯衛人邾人伐齊宋公下公

有會字

桓公甫卒諸侯伐齊霸者之澤可知已。是時齊易牙
 豎刁因內寵殺羣吏立公子無虧孝公奔宋宋襄公
 忘平生之言帥諸侯伐之衛人以怨報德曹人黨讐
 伐喪人情叵測如此

夏師救齊

魯救也

五月戊寅宋師及齊師戰于甌言齊地齊師敗績

宋以諸侯之師伐齊齊人懼殺無虧四公子爭立與
 宋戰宋人敗之而立孝公夫救焚者不齊藁解鬪者

春秋正義 卷五
不控參操戈入室非所以拯孤也故夫齊桓之屬後
嗣禍後嗣者也宋襄之託人孤斲人孤者也

狄救齊

齊桓公身死未寒而人攫其遺孤非我族類猶相救
恤宋衛之君獨為匪人此所謂不如諸夏之亡也

秋八月丁亥葬齊桓公

冬邢人狄人伐衛

為齊伐也齊人之德狄人之怨邢與衛等邢狄助齊
而衛背之詩人所以賦木瓜也

十有九年○春王三月宋人執滕子嬰齊

滕小國也書執惡宋也齊桓公主盟四十年九合之
會滕不至不討恤其小也宋襄公行誼未著竊竊然
自大以求諸侯侮弱為強諸侯所以愈不附矣

夏六月宋公曹人邾人盟于曹南宋公公○鄆子會盟

于邾已酉邾人執鄆子用之

宋欲為盟主乎諸侯大者若齊魯衛陳鄭皆未至也
一鄆子何能濟既至矣而又討其後使邾人用以為
牲施于氓隸不可況友邦之君乎以此希小白之名
猶挾彈而求鳥也

秋宋人圍曹

宋伐曹數矣曹南之盟噫血未乾雖曹反覆已則不
德而人誰肯從曹雖詘矣諸侯皆不附將若何所以
竟爲世嗤也

衛人伐邢

報怨之師也

冬會陳人蔡人楚人鄭人盟于齊

公會

諸侯不忘齊桓而相與脩好于齊楚人與焉則是楚
於齊素交也蒙孫通好管子之書在不然桓公死矣
楚其突至邪以是知桓公擯楚非獨力不能亦并無
是事以是知仲尼黜楚非獨理不可亦并無是心世

儒謂春秋夷楚何據春秋于戎狄不書族書戎戎之
書狄狄之楚與諸侯同人同爵同國其微也與陳蔡
齒其盛也列于諸侯上如以爲夷則宜書蠻與山戎
長狄等況茲始盟豈其無別而輒與諸侯齒乎與諸
侯齒是初未嘗夷楚也

梁亡

梁伯淫酒興作無度國內大潰秦人攜而有之公羊
所謂魚爛而亡也書梁亡梁自亡也故不及秦

二十年○春新作南門

不時也新作創造也

夏郟告子來朝

五月乙巳西宮災

魯別宮也

鄭人入滑

滑從于衛也

秋齊人狄人盟于邢

謀衛也

冬楚人伐隨

隨叛楚也

春秋直解卷五終

春秋直解卷六

僖公下

二十有一年○春秋狄侵衛

為邢侵也

宋人齊人楚人盟于鹿上

宋地

宋求盟也。霸者以力服人。卑矣。人不服而求服。卑尤甚。語曰。以德尊上也。以義尊次也。以強尊下也。宋襄強之未能。烏乎尊。

夏大旱

魯災也

秋宋公楚子陳侯蔡侯鄭伯許男曹伯會于孟執宋公以伐宋

孟宋地公作霍穀作雩

初齊之得諸侯也。宋與有力焉。召陵之役。致江黃以撓楚者。宋也。僖二年。齊宋江黃盟于贛。三年。齊宋江黃會于陽穀。則楚之銜宋久矣。十二年。楚人滅黃。豈遂忘宋乎。十七年。齊桓公死。宋襄公不量力。而欲為桓之事。夫以國無齊之富。以兵無齊之強。以謀臣策士。無齊諸大夫。欲得志。魯衛不可。況微倖于強。忿之楚乎。牛耳未執。身先為虜。詩云。老馬為駒。不顧其後。宋公之謂矣。故直其事。以為霸者之戒。不書楚執諸

侯志也。如世儒之說。惑矣。齊桓未嘗擯楚。強謂之擯楚。以成其霸。宋襄乞盟于楚。又不責其不擯楚。亦予其為霸。無論霸非春秋所予。即擯楚之說。亦自背矣。或云。齊桓不與楚盟。宋襄與盟。所以失之。夫桓不與楚盟。非不欲也。楚自不來耳。楚雖不來。而齊力獨強。故可無需于楚。宋力不能得諸侯。其勢不得不求于楚。故當時霸者。原無擯楚不與會盟之事。不然。宋襄偏執。豈肯乞楚為鹿上之會哉。世儒臆說。以諛霸。而于春秋之旨。戾矣。

冬公伐邾

邾人滅須句。須句子來奔。須句，風姓。公風出，故為伐邾。母夫人成風之志也。

楚人使宜申來獻捷。

伐宋之役，魯人不會。楚執宋公，使人告魯，書獻捷。史尊內也。惟王有獻捷。

十有二月癸丑，公會諸侯盟于薄。釋宋公。

公會懼楚也。不書楚釋諸侯志也。孟子曰：順天者存，魯弱能下人，故免于辱。宋無德好上人，故及于禍。必若儒者言，是仲尼以霸予宋矣。春秋不以霸葬人，豈以霸予人乎？宋襄之事，千古笑端。聖人不遠於人情。

耳

二十有二年。○春，公伐邾，取須句。

瞿

須句滅于邾，魯取而復之。

夏，宋公衛侯許男滕子伐鄭。

宋以鄭人朝楚而伐之，力小好勝，竟底于亡。

秋八月丁未，及邾人戰于升陘。

刑魯地

邾以須句之怨伐魯，公與之戰而敗，不書敗，諱也。

冬十有一月己巳朔，宋公及楚人戰于泓，宋師敗績。

楚伐宋救鄭，宋人禦諸泓水之陽。楚師濟，不畢，不擊。濟已不成列，不擊。濟已成列，戰。宋師敗，宋公傷股，病。

七月而卒。君子曰：霸者之事不可狃也。齊桓偶一鋪張，末路蹶矣。宋襄效之，迂闊挫衄以死。晉文又效之，其子孫驕奢，先諸侯亡，力可暫而難久，假可襲而難持。是以君子賤霸也。說者謂泓之戰，文王之師，孟浪之言與。

二十有三年。○春，齊侯伐宋，圍繆。民宋地，穀作閔。

乘宋之敝，報其伐喪也。

夏五月，庚寅，宋公茲父卒。茲公作慈。

不書葬，諸侯不會也。

秋，楚人伐陳。

討其從宋也。

冬，十有一月，杞子卒。

凡卒諸侯以爵。杞侯卒以子，說者謂仲尼夷杞也。夫杞，神禹之胤，商周之嘉客，始封中原，東徙介于齊魯，卽其地夷，而其君本非夷，卽其君夷，而爵命班自先王。仲尼以已意降一等，可乎？然則何以書子？小國來赴，史降稱以尊內也。不日不名，史畧也。

二十有四年。○春，王正月。

夏，狄伐鄭。○秋，七月。○冬，天王出居于鄭。

鄭與衛爭滑，襄王為衛請于鄭，鄭伯囚王使，王以狄

師伐鄭取櫟遂納狄女爲后叔帶自齊歸通焉王繼
狄后后與叔帶召狄師攻王王奔鄭居于汜凡狄隗
也不稱隗狄之也伐鄭者王也不書王罪狄也天王
出居諱奔也于鄭依讐也倏伐之倏依之威福無常
政焉得不替初周之東遷也鄭爲輔及桓王蒙喪師
之恥襄王懼播遷之禍鄭爲戎故君子曰因不失親
亦可宗也向使其君不以私意爲愛憎其臣不以寵
利居成功豈不令聞長世哉

晉侯夷吾卒

晉惠公卒子圉立是爲懷公未幾重耳入殺懷公自
立是爲文公君子曰重耳小白心跡相方也出奔同
及國同戰而入同生竇殺子糾高梁殺子圍晏同然
小白書入齊重耳不書入晉何也桓公四十年經營
於諸侯小補焉晉文殘險刻薄祚短而取多未可同
日語也

二十有五年○春王正月丙午衛侯燬毀滅邢

衛與邢皆以旣燼之灰受齊桓吹噓而衛居多桓死
衛伐其喪邢人助狄攻之爲齊也衛侯用二禮陰謀
遂滅邢其凶殘險鷲殊無飲水知源同病相憐之意
君子曰不仁哉燬也是以書名

夏四月癸酉衛侯燬卒

上書滅邢下書卒因以爲戒云

宋蕩伯姬來逆婦

伯姬歸宋蕩氏娶魯女爲婦自逆非禮也

宋殺其大夫

無傳其事不可考是歲晉重耳納襄王于周殺叔帶于隰城王出則書入不書何也其出也以天下共主變起房闈禍連夷狄非細故也比其及也非有少康復讐之師殷宗撻伐之武諸侯亡公子借播遷亡王以博一局之勝而侈譚之樹寵利之幟爲世道羞故

城濮勝楚蹇士受命彤弓大輅策命爲侯伯世儒夥頤驚賞而春秋視猶腐鼠也吁可知春秋矣

秋楚人圍陳納頓子于頓

頓子逼于陳奔楚楚人納之往年秦納重耳今年晉納王皆不書書楚納頓子何也其不書者人所欣艷之霸功也其書者人所陵暴之寡小也則仲尼未嘗夷楚亦可知也

葬衛文公

是年晉文公伐原約三日不降去之而原人服儒者稱伐原之信春秋不錄

冬十有二月癸亥公及衛子莒慶盟于洮地切魯

書字史尊內也居喪會盟衛子於是為失禮

二十有六年○春王正月己未公會莒子衛甯速盟于

向速公作邀向莒地

謀齊難也

齊人侵我西鄙公追齊師至鄆奚弗及鄆公作蕩弗左作不

衛齊讐也魯衛同盟故齊侵魯

夏齊人伐我北鄙衛人伐齊

衛為魯報也

公子遂如楚乞師

魯欲報齊乞師于楚毀藩籬而納外寇計之左也終

春秋魯齊不睦坐受晉制所由失策耳

秋楚人滅夔以夔子歸夔公作隗

夔楚同姓楚成王討其不祀先滅之說者以書人書

爵為疑夫諸侯無討而擅滅人國大罪也豈待書名

始見舍明白之大義索一字之隱無謂也

冬楚人伐宋圍緡緡穀作閔

楚師為魯出以宋善晉過而伐之

公以楚師伐齊取穀

春秋正義 卷六
取穀居桓公子雍也。使易牙奉之。楚人戍之。桓公之子七人爲七大夫于楚。

公至自伐齊

二十有七年○春杞子來朝

杞桓公新立也。稱子。史尊內也。

夏六月庚寅齊侯昭卒○秋八月乙未葬齊孝公

齊孝公之卒也。以今年之夏魯導楚師伐齊取穀。卽去年之冬齊赴魯會哀死而釋怨禮也。春秋于齊魯不睦。蓋屢致意焉。

乙巳公子遂帥師入杞

襄仲爲政也。桓公二年杞來朝。不敬。魯討之。今嗣君來朝。又討之。舊史亡其故。不可考。然魯人侮弱可知也。

冬楚人陳侯蔡侯鄭伯許男圍宋

楚人令尹子玉也。楚子在行。而今尹剛愎自用。以至子敗。故不稱楚子。說者謂書人夷之。豈其然乎。

十有二月甲戌公會諸侯盟于宋

楚以諸侯圍宋。魯受盟于師。從楚也。

二十有八年○春晉侯侵曹○晉侯伐衛

諸侯多從楚伐宋者。曹衛寔不與。晉不能得楚嫁禍。

于曹衛以楚親曹衛也
公子買戍衛不卒戍刺之

魯使公子買從楚戍衛晉克衛魯懼殺買說于晉又
以買不卒戍說于楚說辭兩大之間幸免矣然無罪
而殺大夫若之何凡殺大夫不書其事此書直也書
戍衛甚晉也書刺史文也禮淮王三刺以尊內也直
事之失而不訐諱國之惡而不黨所以爲春秋
楚人救衛

宋圍乃解

三月丙午晉侯入曹執曹伯昇宋人

曹無罪晉以楚故入其國執其君昇宋人挾詐力而
行喜怒博一戰之勝而顛連諸侯曹人所爲歌下泉
也其辭曰四國有王郇伯勞之無明王焉有賢伯重
耳所以恣其毒螫矣故聖人刪詩以曹風終列國誌
王迹熄詩亡春秋所以作也千古而知其解者惟孟
子與氏世儒顧謂春秋尊晉賢重耳豈不謬哉

夏四月己巳晉侯齊師宋師秦師及楚人戰于城濮楚
師敗績

儒者之言曰此一役也楚詘而諸侯始從晉晉霸而
中國無楚禍矣城濮之戰召陵之盟千古避之愚謂

不然夫聖人所憂者天下無道耳。有道何擇于楚無道何擇于晉此一役也。而王室可興民生可綏十九諸侯朝覲會同煥然復文武之舊。若是則何愛于楚。城濮之功九廟承之竹帛書之可也。而今楚詘惟詘其晉之所忌耳。勝楚惟晉之自成為盟主耳。楚勝卽諸侯從楚楚不勝亦諸侯從晉。總之王室無賴焉。民生無濟焉。楚衡行中國與晉衡行中國等。

自城濮勝而晉始驕奪人之國邑貪人之貨賄殺人。之臣子執人之君父諸侯終歲奔走惟晉東西非赴晉朝則納晉幣從晉征討天下攘攘不得卽安。仲尼憂之乃作春秋詩云何草不玄何人不矜哀我征夫獨爲匪民。晉與楚均遺仲尼之憂者也。使晉霸天下安春秋不作可矣。或曰楚不敢兼中原非晉之力與。曰然顧晉亦不敢兼諸侯非楚之力與。晉自重耳。納王請隧包藏不軌召天子朝諸侯睥睨神器所不得滿志惟楚人控其膺耳。故有晉不可無楚無楚亦不可有晉存則兩存絀則并絀。彼執夷夏之例爲安攘之說鄙儒之見而不識天下之機者也。然則仲尼稱管仲曰吾其披髮左衽所謂披髮左衽者非楚與曰非也。聖人之寓言也。春秋諸國無披髮左衽者。雖陸

渾赤白狄居中國久亦無披髮左衽者昔戎狄伐周
伐晉侵曹侵杞滅衛齊桓公伐山戎管仲平戎于周
隰朋平戎于晉城緣陵遷杞城楚丘遷衛城夷儀遷
邢所謂免于披髮左衽以此烏在其謂楚乎昔者西
周之亡也以戎而東周之有戎也以晉晉人遷陸渾
于洛以逼東周楚子伐之春秋書之予楚功也豈其
伐戎者反斥為夷而秦戎者反為攘夷乎先王之制
蠻夷要服去王畿二千里戎狄荒服去王畿二千五
百里楚上世為文王師受封先齊魯都郢卽今歸州
去中原纔千里而南蠻遠在炎徼北向之外楚宅南
方侯服之中惟是洞庭彭蠡稱三苗唐虞已分北是
地為華壤久矣豈仲尼作春秋尚追數四凶乎江漢
汝墳二南首善斥為蠻荒則五服缺一面而中原無
南土矣豈春秋之義然則春秋無惡于楚乎曰有之
惡其僭稱王惡其蠶食諸姬吞併小國惡其興兵構
怨與齊晉汨亂天下凡春秋所惡于楚者晉皆有楚
所得罪于春秋者晉不無然則天下何賴于晉何獨
責于楚晉欲致楚不能而說者解朝曰夷狄不可同
盟會夫盟會非聖人之禮不同盟會非聖人之禁世
儒艷霸功而臆為例何可與論春秋也

楚殺其大夫得臣

得臣令尹子玉也城濮之役楚子欲退令尹主戰而敗楚子誅之說者曰晉再勝楚再敗非也禮謀人軍師敗則死之城濮敗而誅子玉泝水退而誅子上鄢陵戰而誅子及屬國叛而誅子辛是乃楚所以振爾衛侯出奔楚

晉以楚故伐衛衛成公請受盟晉不許立其弟叔武成公出奔執而囚之遂使兄弟相夷君臣交訟凡重耳所為深刻怨毒之無已也

五月癸丑公會晉侯齊侯宋公蔡侯鄭伯衛子莒子盟

于踐淺土鄭地

重耳召襄王會踐土以諸侯見遂諷王饗醴策命為侯伯賜大輅弓矢虎賁皆不書春秋之意可知衛子叔武也不成其君故稱子

陳侯如會

後至也陳初從于楚楚敗故即晉

公朝于王所

踐土之會王在不書何也天子不與諸侯齒書王所而王會可知也重耳氣燄方張明禮義以正之故書朝王公朝則諸侯皆朝矣不及諸侯何也不與諸侯

朝也其不與諸侯朝何也諸侯之朝晉以之也不與諸侯朝不與晉之以也凡朝王三年五年于京師于方岳脩禮比瑞召王而朝非禮也其與魯朝何也非與魯也春秋內魯君舉必書其不書地而書王所何也不巡狩述職不御明堂祭告以萬乘廬于野之謂王所爾矣

六月衛侯鄭自楚復歸于衛

名衛侯以別于踐土之衛子也

衛元咺玄上聲出奔晉

晉立叔武使元咺奉之成公入前驅射叔武殺之元

咺奔訟于晉

陳侯款卒

秋杞伯姬來

莊公女歸寧也伯姬適杞今三十有六年矣父母沒而歸寧非禮也

公子遂如齊

齊魯復通好

冬公會晉侯齊侯宋公蔡侯鄭伯陳子莒子邾子秦人于温

會不列王殊至尊也

天王狩于河陽

河陽卽温也。王會于温。晉再召也。踐土召王不書。再召不書。是藪亂也。書與諸侯列。是履冠也。故別書。天王狩于河陽。温在河之陽也。若曰天王出狩云爾。所以振頽風折奸雄。而弭兇節也。寔同會而別書。寔應召而書。狩寔召王而書。王狩寔温而書。河陽不使強。臣陵暴之氣得加乎至尊。名正言順。辭曲義暢。所以爲春秋也。

壬申公朝于王所

入春秋五公上下八十餘年矣。諸侯不朝而踐土河陽。皆天子在招草野。籛廬苟簡之禮。聖人記錄。唯謹以婉轉維持。於姦雄陵厲之秋。使名義凜然。千載而下。想見忠愛之心。正直之氣。非聖作鳥能及此。

晉人執衛侯歸之于京師

以元咺之勳也。歸于京師。譎也。叔武之死。寶重耳致之。非天子而變置諸侯。人誰肯已。固宜其有歎犬之禍也。乃黨賊臣囚君。不避冠履。按重耳之事。而不艱然者。無是非之心者也。

衛元咺自晉復歸于衛

以臣訟君囚其君而縱其臣。不可爲刑。左氏謂晉

文一戰而霸禮義之教也嗟夫重耳為知禮義諸侯遂圍許

晉以不朝王討許也夫許不朝見討諸侯朝不書何也諸侯之朝不足錄許不朝亦可討也然則與晉乎非也晉討不附已以不朝為名春秋不獨罪許亦惡諸侯之從晉圍許者

曹伯襄復歸于曹遂會諸侯圍許

晉文公有疾曹人貨筮史稱曹叔振鐸之為祟也乃釋曹伯按是年夏至冬凡數月書重耳事十有五大抵陵上暴寡兇殘猾賊譎而不正不厭枚舉所謂書

用識哉五霸之罪無如此獨詳矣世儒顧左袒奸雄使春秋大義虧嚴不明可勝歎乎

二十有九年○春介葛盧來

介小國葛盧其君名時公在會不書朝其有他故不可考矣

公至自圍許

夏六月會王人晉人宋人齊人陳人蔡人秦人盟于翟

秋泉周地公作狄會上有公字

尋踐土之盟謀伐鄭也霸者合諸侯屈王臣下盟是天子受盟于諸侯自翟泉始也六國皆大夫魯君往

春秋正義 卷六
故不稱公諱也

秋大雨雹薄○冬介葛盧來

春未見公故復來

三十年○春王正月○夏狄侵齊

重耳方張何以不攘狄詩云彼童而角實虹小子其
霸者攘夷之謂與

秋衛殺其大夫元咺及公子瑕○衛侯鄭歸于衛

元咺歸復立公子瑕甯俞賂晉乃釋衛侯衛侯歸殺
元咺子瑕而後入嗟乎大夫若元咺者亦可殺矣世
儒猶執書爵之例迂矣哉

晉人秦人圍鄭

初重耳出亡過鄭鄭不禮焉至是與秦人圍鄭秦人
私與鄭盟去之秦晉之際始此

介人侵蕭

中原有霸靡國不爭矣

冬天王使宰周公來聘○公子遂如京師遂如晉

入春秋八十餘年魯無如周之使非無使也使陪臣
不書此書何也王以河陽之會致謝慰勸魯以陪臣
報禮且為如晉行故直之說者謂譏遂事謬也

三十有一年○春取濟西田

初晉執曹伯以曹地分諸侯曹伯復而魯猶取其田
失不獨晉也諸侯土宇受之先王霸者以意奪此予
彼亂也故春秋所惡莫如晉

公子遂如晉

拜濟西田也

夏四月四卜郊不從乃免牲猶三望

郊祭王者所以祀天也天子祀天禮也諸侯祀天非
禮也昔者成王尊周公使魯大廟用禘漸及僖公遂
郊天三望而魯之僭多于諸侯矣仲尼諱之郊不書
于不郊免牲書因所廢志所舉也禮大享不卜魯郊

禮乎何必卜非禮卜亦不可再三瀆況乃四乎免牲
免牛也猶三望不望可也禮四方獄瀆天子至一方
則望三諸侯望不越境內魯三望僭也

秋七月○冬杞伯姬來求婦

婦人越國議婚非禮也

狄圍衛○十有二月衛遷于帝丘

穀于
作於

衛為狄滅遷楚丘今三十餘年狄又滅之重耳為方
伯亡其同姓而不問愧小白多矣小白之霸也可以
為名也者取之不可以為名也者置之重耳之霸也
可以為利也者取之不可以為利也者置之小白以

存衛為名。勝狄為無名。故遷衛而不與狄爭也。重耳以勝人為利。救人為無利。故并衛之遷亦不問也。二霸心術人品相去遠。故楚丘遷書城。帝丘遷書衛。無預于晉與諸侯之辭也。

三十有二年。○春王正月。

是年晉楚平。不書。可以觀春秋待晉楚矣。

夏四月己丑。鄭伯捷卒。

捷公作接

衛人侵狄。○秋衛人及狄盟。

衛人之不忘狄宜也。然自強無策。乘其亂侵之。無功。又與之盟。其無能為可知矣。

冬十有二月己卯。晉侯重耳卒。

重耳貪殘之主。斗筲之器。出亡所過。唯酒食是議。唯女子車馬是好。顰笑睚眦。必刻臂書紳。懷螫圖報。是姦猾之老宿耳。當其臨深為高。擠人于淵。不遺餘力。苟求快意。無復怵惕之心。覆曹傾衛。何怨毒之深也。主盟八年。春秋所書十有八事。皆陰險刻薄。無一當人意。而世儒嘖嘖稱為康侯賢伯。豈非詭乎。豈非陋乎。

三十有三年。○春王二月。秦人入滑。

晉邑

秦穆公聽杞子計。潛師越晉。以襲鄭師。及滑。鄭人弦

高詎犒秦師秦謂鄭有備入滑而還

齊侯使國歸父來聘

報襄仲也

夏四月辛巳晉人及姜戎敗秦師于殺公無師字

秦師還及殺晉人邀擊獲其帥孟明西乞白乙丙夫

人文嬴請釋之君子曰晉之託于秦厚矣重耳復國

秦人復之也城濮之戰河陽之會翟泉之盟無役不

與共是秦有大造于晉也背舊好而邀一旦之功晉

實孤恩乘人喪而掠其鄙邑秦實開敵據事直書是

非自見說者曰書人不正之安見不書人者皆正乎

又曰書秦狄之且不稱秦將何稱乎

癸巳葬晉文公○狄侵齊

傳謂因晉喪也重耳在狄人亦圍衛其有晉喪乎且

既為殺之役又何辭于狄傳之諛霸偏曲類此

公伐邾取訾婁訾婁公作婁穀作訾樓

報升陘之役也

秋公子遂帥師伐邾

甚魯也

晉人敗狄于箕

狄侵晉晉人敗之

冬十月公如齊○十有二月公至自齊
朝齊且弔狄難也

乙巳公薨于小寢

小寢以燕息禮君終于路寢

隕霜不殺草李梅實隕公作實

記異也

晉人陳人鄭人伐許

許附楚也

春秋直解卷六終

冬十月公如齊 十一月公至自齊

朝齊 且平狄難也

乙巳公薨于小寢

小寢以燕 且禮君終于路寢

問靈不殺 草李梅實

記吳也

晉人陳人鄭人伐許

許附楚也

春秋直解卷之八終

